

續
文
獻
通
考

續文獻通考卷之三十七

皇明進士雲間王圻纂輯

國用考 漕運上

宋

理宗時知安慶黃幹代撫州陳守奏復轉搬法疏畧曰國家綱運資以餉軍比年以來法紀弛壞非惟軍餉不繼抑亦公私受弊其未離岸有江水淺涸坐食糜費之弊其已離岸有監官侵虧船梢盜竊之弊而其既敗有攤賴平民之弊雖知其弊莫之能革且以江西一路言之如撫州建昌綱之折閱每以水道淺涸不能泛舟延引歲終而未能起隔歲之綱者一綱吏卒水手動數百計

又所招集並皆游手無賴之人自度官吏侵盜大數已
虧恣情極用無所顧忌估藉所償不能萬分之一官司
不免縱之攤賴平民侵削國本爲害不細今若於隆興
置轉搬倉一所每歲一路綱運水脚其費不貲取其所
費養水軍數百人命一武臣爲之長造數十巨艦部以
軍法責之轉輸近襄州軍止以小舟運載納之轉搬倉
却令水軍專一護送更往迭來不假召募綱紀素定部
分素嚴舟楫素具較之烏合嘗試實相萬萬如此則非
惟可以省官綱之折閱抑足以增國家之武備戢江湖
之群盜脫士大夫之罪戾免平民之攤賴是一變法而
群害悉去衆利並興矣

遼聖宗太平時燕地大饑戶部王嘉獻計造船使民諳海
事者漕粟以賑燕民水路艱險多至覆沒鞭笞榜掠民
怨思亂於是首殺王嘉以快衆忿

金

世宗大定初劉璣同知漕運司事奏言漕戶顧直太高虛
費官物宜約量裁損若減三之一歲可省官錢一十五
萬餘貫上是其言

章宗明昌六年三月以北邊糧運括群牧馳以銀五十萬
兩錢二十三萬六千九百貫以備支給銀五萬兩金器
一千八百兩金牌百兩銀盃八十兩絹五萬疋雜綵千
端衣四百四十六襲以脩賞勞

宣宗元光元年六月造舟運陝西糧由大慶關渡以抵湖城

哀宗天興元年八月發丁壯五千人運糧以餉合喜合喜時爲樞密使將兵應完顏思烈等自汝州急入援故餉之

元

世祖中統四年詔北京運米五千石赴開平其車牛之費並從官給至元十三年遣瀘州屯田軍四千轉漕重慶二十二年增濟州漕三千艘役夫萬二千年初江淮歲漕米百萬石于京師海運十萬膠萊六十萬石而濟之所運三十萬石水淺舟不能達更以百石之舟運

用四人故夫數增多 二十九年開通惠河以郭守敬
領都水監初言水利有十一事其一欲道昌平縣白浮
村神仙泉過雙塔榆河引一畝玉泉諸水入城滙于積
水潭從東折而南入舊河每十里置一牐以時蓄洩帝
稱善復置都水監命守敬領之丞相以下皆親操畚鍤
爲之倡置牐之處往往於地中得舊時磚木人服其識
逾年畢工自是免都民陸輓之勞上悅賜名曰通惠

英宗至治三年江浙行省言鎮江運河全籍練河之水爲
上源漕運商販舟楫無不由此以供億前朝嘗濬此湖
瀦畜潦水若運河水淺開放練河一寸可添河水一尺
近年淤淺以致通運不通乞加修治制可工畢又置湖

兵百人專任修理

順帝至正九年十一月漕運使賈魯建言便益二十餘事
其一曰京畿和羅二曰優卹漕司舊領漕戶三曰接運
委官四曰通州總治豫定委官五曰船戶困於壩夫海
糧壞於壩戶六曰疏濬運河七曰臨清萬戶府當隸漕
司八曰宜以宣忠船戶付本司節制 十五年江浙省
臣乞減海運以甦民困戶部定擬本年稅糧除免征外
其寺觀并撥賜田糧十月開倉盡行拘收其不敷糧撥
至元折中統鈔一百五十萬錠於產米處糴一百五十
萬石貯瀕河之地以聽撥運從之

皇明

太祖定鼎金陵凡四方貢賦各緣其所至入於江達於京師及成祖遷都於燕百官衛士仰需江南於是始議立運法派爲二道一由江入海出直沽口由白河運至通州謂之海運一由江入淮黃河至陽武縣陸運至衛輝府由衛河運至薊州謂之河運

國初海運因元之故海運不給於是陸運以濟之陸之勞蓋不減海之險也及會通河旣浚於是有饋運而海運乃罷遮洋海運猶不廢焉然饋運之初皆支運也旣而議者以爲軍民不便於是有兌運時支運纔四十之一而故法幾廢矣蓋凡五變而小小損益不與焉其勢然也按五變一曰海運二曰海陸兼運三曰支運四

曰兌運五曰改兌俱詳於後

太祖洪武二年令戶部於蘇州太倉儲糧二千萬石以脩海運供給遼東 六年冬十二月浚開封漕河明年春轉漕粟于陝西 十三年海運糧七十萬石於遼東 二十二年令海運蘇州太倉糧米六十萬石以給遼東 官軍所謂海運者是也蓋是時止以餉邊而已 三十年海運糧七十萬石於遼東

按是時海船有一千料有四百料名鑽風海船後永樂中改海運遂改四百料爲淺船淺船因海船得名

成祖永樂元年令於淮安用船可載三百石以上者運糧入淮河沙河至陳州潁岐口跌坡下用淺船可載一百

石以上者運至跌坡上別以大船載入黃河至八柳樹等處令河南車夫赴衛河轉輸北京此變海運之始六年海運糧六十五萬一千二百一十石于北京時駕駐北平百費仰之不但餉邊矣 十二年海運糧四十八萬四千八百一十石于通州又衛河僭運糧四十五萬二千七百七十六石于北京所謂海陸兼運者是也 十三年時會通河成遂令浙江嘉湖杭與直隸蘇松常鎮等秋糧除存畱并起運南京供 內府等項外其餘原坐太倉海運之數盡改撥運淮安倉交收揚州鳳陽淮安三府秋糧內每歲定撥六十萬石運至徐州倉交收徐州并山東兗州府秋糧內每歲定撥三十萬

石俱令民運赴濟寧倉交收河南山東稅糧令民運至臨清倉交收仍令淺河船於會通河以三千隻支淮安糧運至濟寧倉以二千隻支濟寧糧運赴通州倉每歲通運四次所謂支運者是也其天津并通州等衛各撥官軍於通州接運至京蓋自是海運不復行矣先是遣平江伯陳瑄往湖廣江西等處造舟二千艘以從河運瑄建言造平底淺船甚稱便焉歲可運三百餘萬石至京是時遮洋船每歲於河南山東小灘等水次兌運糧三十萬石於天津等衛倉收二十四萬石連耗折銀六錢俱從直沽入海轉運薊州倉收是年又令浙江都司并直隸衛分官軍於淮安運糧至徐州置倉收囤

京衛官軍於徐州運糧於德州置倉收囤山東河南都司官軍於德州運糧至通州交收淮安常盈倉本部各委主事一員監督收放其僨運糧每石俱兩平斛斗收放官軍僨運止一尖一平定爲例 末年瑄復計議凡民運糧俱於淮安瓜洲水次令軍民於此對船交兌令軍船奏請于淮安瓜洲水次令軍民於此對船交兌令軍船出給通關付還與民銷繳仍令民補腳價在淮安水次者每正糧一石外加五斗在瓜洲水次者每正糧一石加五斗五升 十六年僨運糧四百六十四萬六千五百三十石於北京 是年令浙江湖廣江西并蘇松常鎮等處稅糧除存留及起運南京外餘糧坐撥一百五

十萬石零糧里人戶自脩船隻運赴北京通州河西務等處上倉 二十一年奏准每歲漕運以兩運赴京倉一運赴通州倉交納

宣宗宣德二年令浙江江西湖廣并直隸蘇松等處起運淮安徐州倉糧撥民自運赴通州倉其運糧官軍於淮安南京支運 四年仍令江西湖廣浙江民運糧一百五十萬石貯淮安倉蘇松寧國池州廬州安慶廣德民運糧二百七十四萬石貯徐州倉應天鎮江常州太平淮安揚州鳳陽及滁州和州民運糧二百二十萬石貯臨清倉令官軍支運山東河南北直隸府州縣糧經赴北京其僭運軍船量地遠近與糧多寡如淮安上糧民

船十抽其一徐州十二抽一臨清十五抽一給與官軍
兼舊船運載 五年令河南南陽懷慶汝寧三府糧運
於臨清倉開封彰德衛輝三府糧運於德州倉交收
是年又令江南民糧兌撥附近衛所官軍運載至京量
其遠近給與路費耗米此兌運之漸也 六年奏准浙
江江西湖廣蘇松常鎮太平等府僉撥民丁及軍多衛
所添撥軍士與見運軍士通二十四萬分兩班更替僉
運所謂僉運之初皆支運者是也 七年始立兌運法
先是各處糧米民運淮安徐州臨清德州水次四倉交
收漕運官軍分派官轉運於通州天津二倉往返經年
以故民違農業永樂末從侍郎周忱議始令民運於淮

安瓜洲補給腳價兌與運軍軍民兩益衛所出給通關
付繳後叅將吳亮又言遂令江西浙江湖廣江南等處
糧米各官軍於各附近水次領兌南京江北府州縣糧
於瓜洲淮安交兌其淮徐臨德四倉仍支運十分之四
浙江蘇松等船各於本地方領兌不盡者仍赴瓜淮交
兌河南所屬民糧運至大名府小灘兌與遮洋海船官
軍領運山東濟南州縣於濟寧交兌官軍領兌必量其
地之遠近費之多少定爲加耗腳米則例又給以輕齎
銀兩以爲洪腫盤剝之費許其附載貨物以爲沿途衣
食之資是謂轉運變而爲兌運也 是年又增撥南京
豹韜左等衛及各都司直隸衛所軍餘并見運官軍共

一十六萬儲運糧儲

憲宗成化七年都御史滕昭議罷瓜淮兌運裏河官軍顧
江船於江南水次交兌民加過江之費浙江等處每正
糧一石外加過江米一斗南直隸等處每正糧一石外
加過江米一斗三升是謂兌運變而爲長運也 十年
始立改兌法先是江西應天蘇松等處糧民自運上納
淮徐臨德四倉官軍赴倉支領運送京通二倉至是議
抽支運米七十萬石改令官軍各赴彼水次交兌
國初漕額歲運四百萬八千九百九十八石九斗九升二
合

宣宗宣德八年儲運糧五百餘萬石通倉收二分京倉收

八分

英宗正統二年僭運糧四百五十六萬石通州收六分京倉收四分

景皇帝景泰二年僭運糧四百二十三萬五千石 七年官軍兌運糧二百八十一萬三千四百八十石於淮安臨清東昌徐州德州有糧倉收支運一十一萬六千二百石三斗共運糧二百九十二萬九千五百五十石三斗內遮洋船運糧三十萬石以二十四萬石於蘇州倉收六萬石於京通二倉收

英宗天順四年僭運糧四百三十五萬石內兌運三百六十三萬八千二百石淮安臨清徐州倉支運七十一萬

一千八百石內遮洋船運三十萬石以二十四萬石於蘇州倉收六萬石於天津等衛倉收

憲宗成化八年定僨運糧每歲四百萬石

孝宗弘治二年僨運糧四百萬石內兌運二百三十萬石支運七十萬石

武宗正德六年僨運糧四百萬石內兌運三百三十萬石改兌六十三萬三千石支運倉糧六萬七千石

世宗嘉靖元年僨運糧四百萬石內兌運三百三十萬石改兌六十二萬九千四百石支運倉糧七萬六百石

二十八年見行議單每漕運四百萬石內該兌運三百三十萬石改兌七十萬石

各省直兌運數

浙江六十萬石 江西四十萬石 湖廣二十五萬石

內折色三萬七千七百三十四石七十七 應天府一十萬石 蘇州府六

十五萬五千石 松江府二十萬三千石 常州府一

十七萬五千石 鎮江府八萬石 寧國府三萬石

池州府二萬五千石 廬州府一萬石 淮安府二萬

五千石 太平府一萬七千石 安慶府六萬石 鳳

陽府三萬石 揚州府六萬石 徐州三萬石 山東

二十八萬石 內折色七萬石 河南二十七萬石 內折色七萬石

各改兌運數

江西一十七萬石 應天府二萬八千石 蘇州府四

萬二千石 松江府二萬九千九百五十石 廣德州

八千石 鎮江府一萬石 淮安府一萬一百五十石

以上舊俱運淮
安府常盈倉 浙江三萬石 揚州府三萬七千石

鳳陽府三萬三百石 徐州一萬八千石 鎮江府

一萬二千石 淮安府六萬九千石 以上舊運徐
州廣運倉 山

東二萬六百石 河南五萬石 以上舊運臨
清廣積倉 山東七

萬五千石 河南六萬石 以上舊運
德州倉

又支運米六十四萬四千八十三石三斗

天津倉米六萬石 薊州倉本色米十萬石折色米一

十四萬石 密雲鎮米一十五萬四千八百一十石八

斗 昌平鎮米一十八萬九千二百七十二石五斗 以上

卽上兌
運內數

又預脩米一十九萬四千四百石

臨清廣積倉收山東五萬四百石又河南六萬石 德

州德州倉收山東六萬石又河南二萬石

漕運總數

漕糧先年俱民運淮徐臨德四倉軍船接運入京通二
倉名爲支運永樂末始令民運赴淮安瓜洲補給腳價
兌與軍船領運名爲兌運其四倉仍十之三四後兌運
漸增又令軍船各回附近水次領兌民加與過江腳價
視遠近爲差成化十一等年改四倉米七十萬石令各
軍徑赴水次領兌名爲改兌其兌運中又分支運米與

天津薊州密雲昌平其正額外又有預脩米貯於臨德
二倉歲運米四百萬石北糧七十五萬五千六百石南
糧三百二十四萬四千四百石內兌運三百三十萬石
改兌七十萬石除例折外每年實通運正耗糧五百一
十八萬九千七百石 前項兌糧米倘災傷等項停免
聽各該巡撫官如蘇州府有災該免則於附近松江常
州等處撥補足數安慶府有災該免則於附近太平府
撥補足數其餘府分有災俱照此例奏補候災傷府分
有收仍照撥補之數徵完如果附近府分各有災傷無
處湊補漕運就將臨德二倉收貯糧米照數支運務要
不失原運四百萬之數 漕運總兵官萬表疏舊例漕

運糧四百萬石倘有災傷等項停免於附近府分撥補附近府分各有災傷就臨德二倉照數支運庶不失原運四百萬石之數續以臨德二倉糧米有限故准折銀臣愚以爲理財之道莫要于本折通融如豐年米賤全運本色遇災傷量減折色而本折相兼爲用國計亦不爲無補漕運糧斛除河道工役之費其輕齎耗米并脩造淺船糧銀官軍行月等糧率四石致一石艱難險阻實不易得如今年支運京軍月糧每米一石不過易銀三錢難得而賤用似爲可惜若以先年所收折銀每石七錢者作二石放支候至米貴之年方放本色則軍需實濟矣 俞諫漕例疏漕運糧船先年海運至京俱

經文武大臣建議開濬會通河分十二總遂罷海運其
歲運糧四百萬石內蘇州邊儲獨遮洋一總尚留南京
水軍左等八衛江北淮揚等五衛軍船俱於小灘鎮等
水次兌運山東河南糧米三十萬石仍由海道以抵薊
州天津二倉成化間又因海道不便姑自小直沽開通
新河一道當時遮洋海船每二隻該旗軍三十六名改
造五百二十五隻旗軍六千三百名時船隻運道雖改
衛所官軍俱仍舊役雖或愛禮存羊而其地理之遠近
往來之怠緩軍船之狼狽糧運之稽遲誠有如郎中趙
戴之所言者矣至若河南一總上下兩江催餉甚遠不
免顧此失彼而趙戴又復言及皆切漕運要務查得南

京淮揚等一十三衛官軍昔因習知海道在於遮洋今日既由新河僭運却乃空身自南趨北不惟途路艱辛人情事體甚爲不便抑且江北船多摘撥江南就充加費過江一三脚米而南京行糧且又重費年復一年尤當愛惜况遮洋年議准折色數多軍額減存但辦料數少食糧則多亦應區處及查北直隸總下德州天津二倉不惟道途近甚抑且原運正耗相若人情允便所宜改撥合將遮洋江北淮太高揚長淮五衛旗軍三千三百一十二名照舊不動外將北直隸總下德州天津等衛共九衛旗軍一千七百六十四名并入本總其不足之數再於附近徐州左泗二衛添撥旗軍一千二百

二十四名通抵南京遠軍共足六千三百名原數以備歲運三十萬石舊額仍於遮洋總處就令孫機管理遇有減存臨時酌派以蘇軍困仍將孫機原額退與南京領駕其退下南京水軍左等八衛官軍添入江南分爲上下江二總就以程鵬二人分管旗軍仍每船十名船不過壩亦各存與過江米六升却將原一二裁去七升各總以截上江者兌安慶池太廣德等府州糧米多餘軍船領兌江西不盡之糧下江者兌蘇松常鎮四府糧米多餘軍船領兌浙江不盡之糧通共爲一總其南京二總每年却分浙江二處儘總撥兌餘船方撥江南至若浙江等總軍船雖有多寡亦每就近酌派事不大害

不必槩爲更張其改撥遞洋行糧查照議單北直隸者
仍舊二石徐州左泗二衛俱照淮太二石八斗如此庶
水軍左等八衛得以就近領兌江南之糧免駕空船北
行江南一總得以分投催餉亦免往來督兌之難遠近
適均水程順便而糧運不致稽延且行腳米亦得以少
省矣

廣東陳建云嘉靖數年間河益南徙而衝渦奔毫震驚
皇陵徐房而南安東淮北皆被其害以河流無所分
而一淮不足以並容全河之委也衆說紛紛愚謂欲河
之北以循古道者爲河患也猶幸其南所以佐漕也顧
河能佐漕亦能決漕累朝漕源之費已不貲矣故嘗有

言曰前代之河決也不過損民田廬故治之者在急除
民害 國家之河決也惠及漕運故治之者事關 國
計今日治河視古豈不尤難哉

加耗輕齎數

兌運米

江西湖廣浙江每石加耗米六斗六升又兩尖米一斗
共七斗六升內除四斗隨船作耗餘米三斗六升折銀
一錢八分名三六輕齎

江南直隸并江北廬州等府每石加耗米五斗六升又
兩尖米一斗共六斗六升內除四斗隨船作耗餘米二
斗六升折銀一錢三分名二六輕齎

山東河南府州縣每石加耗米三斗一升又兩尖米一斗共四斗一升內除二斗五升隨船作耗餘米一斗六升折銀八分名一六輕齎

已上輕齎銀俱備運軍盤剝費用後濬通惠河成始立減扣之法除一六照舊外其二六者原餘米二斗六升減去二升改爲二四輕齎於內仍扣銀一分三六者原餘米三斗六升減去二升改爲三四輕齎於內仍扣留銀二分扣留者以備修理通惠河閘座等項支用量減者以寬民力

改兌米

浙江江西每石加耗米四斗二升應天井江南直隸每

石加耗米三斗二升

北直隸每石加耗米二斗七升

已上各加耗內各折米二升易銀一分名折易輕齎
銀餘俱本色

徐州每石加耗米二斗二升

山東河南每石加耗米一斗七升遮洋船一斗五升

已上俱本色凡改兌糧盤剥之費各吃本總兌運輕
齎銀與各折易銀兼支名爲吃貼

宣宗宣德八年令兌運民糧加耗湖廣每一石八斗江西
浙江七斗南直隸六斗江北揚州淮安鳳陽五斗徐州
四斗山東河南三斗若民自運至淮安瓜洲等處兌軍

者四斗 十年令湖廣江西浙江耗米俱六斗江南直隸五斗江北直隸四斗徐州三斗五升山東河南二斗五升 又令各處起運京倉大小米麥先封乾圓潔淨樣米送部轉發各倉收候運糧到日比對相同方許收納

英宗正統元年奏准兌運糧加耗江北淮安鳳陽四斗五升浙江蘇松等府民自運至瓜洲兌運者三斗七升淮安者三斗餘如舊 十三年令湖廣江西浙江加耗俱六斗五升江北揚州淮安鳳陽四斗五升河南民糧於蕭縣水次兌者四斗民自運至瓜淮等處兌軍運者三斗其兌運料豆加耗亦准此例

憲宗成化六年奏罷蘇松等府民運糧仍舊軍運 十年
令湖廣江西浙江加耗每石四斗應天并江南直隸各
府一斗五升徐州二斗山東河南一斗五升 十一年
罷民運淮徐臨德等倉糧令軍船徑至水次領兌運送
京通二倉交納 二十三年令改造遮洋運船爲淺船
從新河僨運其運糧并人夫亦照淺船例均派每船旗
軍十名

孝宗弘治二年令官軍上納京通二倉糧兌運者加耗七
升改兌者四升支運并遮洋船仍舊一尖一平收受
十八年 詔明年漕運米以十分爲率內二分照例折
銀以蘇民困

武宗正德十年奏准輕齎銀兩各司府州縣每年各隨正糧一併兌完方許出給通關 十六年奏准各處原派臨清倉民運糧七萬六百石今後照數徵完就於各水次聽漕運衙門撥到軍船交兌不必民運到倉

世宗嘉靖五年令以 顯陵衛原運湖廣正糧二萬三千九百三十四石七斗折銀解赴太倉收納船隻派與無船衛分撐駕 六年奏准開濬通惠河修理閘座築堤立壩造船盤剥以便糧運每年二月本部請 勅給赴通倉坐糧員外會同巡倉御史督理其各總輕資銀兩照例驗給扣省腳價解部轉送太倉銀庫交收以備修河等項支用羨餘銀兩給散運軍 八年議准湖廣浙

江江西江南江北等總漕運衙門各將解到輕賚銀兩
量給十分之三責付把總收領以脩官軍沿途盤剝之
費七分照舊驗封候完糧扣筭其山東河南輕齎不必
先給 又議准官軍過江領兌蘇州等處糧米者江北
三總并廬州衛每石過江腳米一斗三升南京兩總并
鎮江衛每石七升其廬州衛本府兌者六升 十一年
題准遼洋額運本色米除六萬石原運天津外其運薊
州倉一十萬石將數內四萬石每石連耗徵價銀九錢
遇放支官軍附近衛所給與本色其太平寨燕河營等
寫遠去處與本色相兼支放每石折銀六錢五分扣除
銀兩通融支放 十二年又議准自本年爲始過江脚

米一斗三升內將七升每斗折銀六分以爲顧船之資
六升仍舊本色以爲過壩盤剝之費 十六年又議准
兌運糧米照舊分派京倉七分通倉三分改兌京倉四
分通倉六分合貼腳價於兌運輕齎銀兩照舊挖給

漕程限

憲宗成化八年令運糧至京倉北直隸并河南山東衛所
限五月初一日南直隸并鳳陽等衛所限七月初一日
若過江支兌者限八月初一日浙江江西湖廣都司衛
所限九月初一日其把總都指揮及領運千百戶等官
違限二十日以上住俸待罪若連運三年違限者遞降
一級二年不違限者量加獎勵三年不違限者量加旌

題俱奏請定奪

孝宗弘治八年奏准各處兌運糧每歲布按二司及直隸府州縣管糧官督屬徵收年終赴運水次候正月交兌初違限一年二年者附過還職連違限三年者以罷軟起送吏部其各該分巡分守管糧官員以十分爲率五分不完者亦照此例管運官照府州縣例把總官照分巡分守例連違限三年聽漕運衙門黜退不許管軍管事

武宗正德五年令漕運衙門以漕運水程日數列爲圖格給與各幫官員收掌逐日將行止地方填註一格同原給幫帖送部查考事完送漕運衙門查繳無故違悞運

官住俸問罪若有司交兌遲延罪歸有司

世宗嘉靖二年令自今年爲始部倉查各官到部完納月日比先早一月者指揮等官量加犒勞三次俱早一月把總等官於實職上陞一級比先年遲者卽送法司問罪照例發落 八年又議准南直隸浙江坐派起運

內府各監局及吏部等衙門細熟白糙粳糯米等每年十月終徵足差官十二月以裏開船前來交納如違照兌運事例叅奏治罪 十四年題准今後一應兌軍改兌秋糧務在及時派徵依例限運赴水次聽候交兌若正月終有司無糧軍衛無船者府州縣掌印管糧官領運指揮千百戶各住俸半年二月終無糧無船者問罪

住俸一年延至三月終船糧不到府州縣掌印管糧官領運指揮千百戶提問降二級四月終船糧不到不分多寡連布政司掌印管糧官領運把總通降二級文職起送吏部別用軍職發回原衛帶俸差操

考察運官

孝宗弘治十三年令本部會同兵部及漕運都御史等官考察運糧各衛所指揮千百戶廉幹有爲者存留管事貪婪無爲者革退另選相應官代補

世宗嘉靖十四年題准運糧把總衛所總等官每三年一次戶兵二部會同考察分別去留等第奏請定奪千百戶鎮撫等官亦三年一次漕運衙門考選各處衛所總

官有缺查照節年有領運年深諳練漕事或僉書軍政等官素有才力者選擇取補如有科擾軍士侵費錢糧等項聽漕運衙門本部監兌委官并巡按御史指實叅究黜罰不在三年考察之限

漕運月糧

成祖永樂十三年令各衛所運糧官軍行糧每員名不分遠近俱支三石以後增減事例不同

世宗嘉靖十七年議准今後運軍月糧先將應徵存留糧斛依期徵給如徵有不及或災傷停免聽將倉庫別項錢糧預行通融處給其行糧例該本處闕支者雖派別省兌運仍舊在於本處若兌本省原議水次隨支者俱

要預期徵完隨同正糧一併交兌如果徵收不齊行糧每石折銀五錢月糧查照彼中折筭處給

漕運漂流

世宗嘉靖八年議准沿途遇風損壞船隻漂流糧米許赴所在官司具實陳告掌印官親詣漂流處所勘實具奏仍候本部轉行巡按御史覆勘明白方許除豁如有乘機侵盜扶同勘報情弊就將漕運官軍并有司官吏通行叅送法司問罪俱發邊衛充軍 又議准漂流糧米例該減除通州上納者如遇通州倉缺厥仍令赴京倉上納每漂流一百二十石免曬一千石亦兩平收受每石計省曬折米五升并耗米七升共一斗二升以補漂

續文獻通考 卷之三十一
流之數前項米石俱不挨陳先行放支

漕運雜行

宣宗宣德十年令漕運總兵官每年八月赴京議事

周忱言行錄云宣德間公爲工部右侍郎巡撫南直隸
初蘇州府稅糧負欠七百九十餘萬石常松亦然公至
詢父老皆云蘇松民俗大戶不出加耗以致小戶連累
納欠公乃使大小戶一例加耗官降斛斗久失糧長往
往私造大入小出公奏行南京工部鑄造鐵斛發屬縣
依造木斛較勘烙印給與糧長收槩於是出入均平蘇
州糧額二百九十餘萬石公同知府况鍾奏減八十餘
萬石舊例不許團局收糧糧長自徵收公曰此負欠之

由也遂令各縣於水次置囤編囤聚一處推糧長一人
總之名曰總收定與加耗總徵平米上囤每囤設糧頭
囤戶各一名管收置立撥運文簿支撥起運加耗者正
糧一石收平米一石七斗候起運之時酌量支撥如京
通等倉遠運正米一石支與三石臨清淮安南京等倉
以次定支置立綱運文簿聽其剥淺等項費用填註回
銷支撥羨餘存積在倉號曰餘米次年餘多令加六徵
收又次年益多令加五除依前撥運外猶有附餘令各
縣造倉一所名曰濟農將遍年餘米入以補賑濟

英宗正統十三年令各處兌運民糧每二石與新蘆席一
領其淮安等處倉支運者每二石領墊倉舊席一領至

京通二倉每百領除損壞止納七十領

憲宗成化六年十月戶部會官議巡撫漕運等官所陳事宜其一蘇州松江常州及嘉興湖州五府輪運內府白熟粳糯米并各府部糙粳米每歲十六萬石俱官給以船今經沿途輓廠鈔關必欲如民船帶輓納鈔兼遇水涸守閘又爲運軍凌逼及抵揚州等處則攬頭包攬巧肆刻削是以留滯日久困於負貸請罷帶輓納鈔之例及禁包攬之害仍移文漕運官令軍民船皆魚貫而行其有漂流糧米以該納京倉者改納通州省腳價以補其數上從之

萬表云太倉起剥則例一版兌正糧一萬二千石每石

加耗米七升共計八百四十石約定四百八十石作正
支銷餘准作耗數內扣五十石或一百石其欠二百石
以上經歷官攢甲斗級照依欠數多寡責治有差數外
間有餘剩者則是多收之數不敢別作支銷節年於倉
中隙地掘窖埋之後主收者日苛剩餘者漸多嘉靖十
三年周侍郎叙初督倉場見餘米歲埋歲多心切惜之
乃言於大司徒梁公材公曰此米附餘四百四十
石之外若欲具題作正支銷主收者法應叅究况起
此附餘之端他日害大計矣寧復棄之不敢作偏也周
乃貯之空廩以數作一手本報部公亦不受令總督廳
自計乃知老臣固識體耳夫每廩明交耗糧八百四十

石以其不得盡耗責以四百八十石附餘作正支銷然或缺少亦止於責治而已不爲深究蓋恐後之流弊至於多收也宣德年間京通二倉收受斛米一尖一平尖斛淋尖平斛槩行後將淋尖斛外餘米俱要入官有虧旗甲至元年叅將袁佑奏要每石不分平尖明加一斗俱各鐵斛收受戶部題奉 欽依只加耗五升此佑之見惟目前之圖而無長久之慮彼當事者有存寬厚之意耳至二年又該戶部題准加八升今載入議單每石兌運加耗七升則原爲尖斛而增今于加耗之外復收斛面以爲附餘則是耗外又有加耗矣正德十六年表總浙運時每石只加七升以進倉便發交納常有餘剩

之米照出今每石加二五進倉尚有掛欠若不革去耗
外斛面行槩平收則軍逃運敝雖有善者亦無如之何
蓋雖取之斛面餘米不多而國計根本所繫爲害者
大此只十數年來之弊老成籌國者固當革弊以存大
計可也

孝宗弘治十八年令張家灣水兌糧米腳價每石原定一
錢者減作八分天津衛寄收糧米腳價每石原定一錢
五分者減作一錢二分其扣下京衛事故官軍兌支不
盡正耗之數及明加免曬折席等項有米者俱准運赴
通倉上納無米者每石折銀五錢與腳價銀兩俱送太
倉銀庫交收

武宗正德九年奏定起旱脚價自張家灣至京倉晴乾日每銀一兩起載米一十七石陰濕一十三石天色初晴道路猶濕一十五石張家灣里兒寺至通倉每銀一兩起載三十三石長店兒至通倉四十石灘子里至通倉五十石自十年以後各總運船到灣之日即將前項腳價於戶部委官處驗封交收以憑支給

世宗嘉靖八年議准司府州縣管糧官各於水次同兌運官將成化十五年原頒降永爲法則字樣鐵斛與依式成造印記木斛較量相同就便交兌如有將私造大斛用強交兌者監兌官及撫按官依律照例拿問 又議准把總指揮千百戶等官索要運軍常例銀兩科索至

十兩以上者問罪降一級二十兩以上者降二級四十兩以上者降三級發原衛帶俸差操再不准用至五十兩以上者問罪發邊遠充軍跟官書算人等科索軍士銀兩侵欺入已至十兩以上者問發永遠充軍 又議准兌軍民糧交納蘆蓆以三分爲率二分納本色一分折銀每領折銀一分又每米二千石納枋木一根松板九片亦以三分爲率二分納本色一分納銀每板一片折銀二錢五分俱隨糧收受出給通關其銀太倉銀庫另貯以備修倉等項支用薊州天津四倉蘆蓆與京通倉例同松板枋木每船交納用銀八錢 又議准通惠河經紀船脚每糧一石銀二分一厘一絲八忽二微六

開水脚每石銀九厘一毫三絲九忽一微車戶車脚每石銀一分四厘八毫四絲二忽七微京通倉歇家包囤每石銀八厘五毫曬夫飯米每船一兩一錢小脚耗糧到囤每石四厘僱人抱籌抬斛打捲每石七毫買墊囤葦把每船二錢買掀掃把斗每船三錢軍斗籌價每石銀五厘京倉蓆板隨船帶至大通橋蓆令車戶帶運備雨每板一片木一根各准米一石起脚京通倉運官交糧紙劄銀每處二兩官軍房水銀指揮三兩千戶百戶各二兩旗軍每船京倉一兩二錢通倉一兩各該把總過糧運到倉呈驗輕齎之後先將前銀交送京通二倉坐糧員外收貯提督官給發印信文簿各二扇一扇查

收一扇查給在運官者領用在倉中者歇脚領用

邵實曰我朝運法所謂法者卽今支運是也故有淮徐臨德水次四倉以受民間輸納運官者於斯領焉歸於京通二倉雖遇災傷民有免徵而軍無免運支者不必出當年之民納納者不必供當年之軍支蓋通數年以爲衷益雖歲有豐歉而常數不缺及支變爲兌繼而又有改兌向者轉輸今也直達派徵免納叢於一歲之中於是軍無餘力而缺於常數豈得已哉若今南有非常之水北有非常之寇則又不待論也當是之時所謂變通者無他不過漸復支運之法而已支運之難難於脚價不足則糧不自行其理然也苟能預處脚價以擬

兵荒之事於舊例支運七十萬石之外每遇兌缺則支以補之歲不失四百萬石之數此於國計爲便不可不慮而處之也

腳耗輕齎新例

今上萬曆元年題准江北三總派兌南糧原定腳米一斗三升額覓江船今瓜洲建閘徑赴水次聽兌蠲免七升止徵六升其南京各衛通到水次原徵七升今免一升止徵六升二年題准各處隨糧輕齎銀通解漕司內將三分給運官其七分選定解官稱驗明白各令入鞘類至十萬上下裝入標船星夜越幫前進送通倉坐糧郎中稱過寄庫候該幫船到驗給運官完糧其山東河

商者原不過淮責成臨清兵備差官陸路解進 七年
令輕齎銀兩照議單分爲三七以三分給本幫備船沿
途空貼等費其羨餘兌給回南旗軍一分餘候完掣通
關之日查無掛欠亦便與運官領回分給不必扣貯
十一年以江西饒州等五所淺船改并進賢水次修造
免徵過期湖米銀 十三年題准輕齎羨餘銀舊例一
分解准二分給軍今照萬曆七年例惟山東遼洋二總
每船仍止給銀一兩中都錦衣旗手上江下江淮大揚
州七總原議每船一兩五錢今增五錢共二兩浙東浙
西湖廣江西四總原議每船三兩今增一兩共四兩其
扣省銀兩京倉八項通倉六項照舊扣除

新定漕規

今上萬曆元年題准湖廣衡永荆岳長沙漕糧原在城陵磯交兌者改并漢口水次 十一年改漢口交兌於金沙洲陳公套水次

凡樣米萬曆四年議准各處樣米山東江南限正月江北直隸限二月江南直隸限三月浙江湖廣限四月各分頭幫解送總督衙門收候運糧到日轉發各倉比對凡運糧程限萬曆二年題准舊列湖廣江西浙江三總限三月過淮者多與黃水相值今定限二月過淮如違查久近分別治罪

凡優恤官軍萬曆七年題准領運等官應給盤纏但經

以贓私不法忝論者盡行停給完報違限三月以上而
過淮先期依期與完糧不違限而過淮後期及淮北例
不過淮而完糧違限三月以上各給一半過淮後期完
糧違限三月以上給與三分之一完糧違限五月以上
不論過淮先期盡行停給運軍應得羨餘姑准給與其
停扣銀兩俱類解太倉 十二年議准運軍中途病故
預支安家月糧俱免還官仍優恤二年其遺下行糧給
本船旗軍以充補募免下年扣除若中途脫逃者獲日
間罪仍追安家月糧還官 又議准運軍土宜監兌糧
儲等官水次先行搜檢督押司道及府佐官員沿途稽
查經過儀真聽僨運御史盤詰淮安天津聽理刑主事

兵備道盤詰六十石之外俱行入官前途經盤官員徇情賣法一併叅治其餘衙門俱免投文盤詰

凡漂流萬曆元年議准凡官旗漂流船糧卽赴所在督押司道陳告當日委官親勘具奏收糧之日減除免曬處補若未經奏到雖有執照卽係假捏不得一槩混支其起欠掛欠明係侵欺與漂欠不同不得妄援前例

六年題准如遇漂流在楊子江者先赴就近把總處具告一面赴督押司道官處告委有司相去一百里者限二日一百里外者限四日勘實呈漕司卽與具奏除豁如有違限扶捏等弊卽將勘官叅問官旗分別捏報漂欠虛數多寡問擬重罪其河道漂流者卽令本幫補納

不敷量動槩幫潤米攤補不得一槩奏豁 十二年議

准漕運官軍如有水次折乾沿途盜賣自度糧米短少故將船放失漂流及雖係漂流損失不多乘機侵匿捏作全數賄囑有司官吏扶同奏勘者前後幫船及地方居民有能覺察告首漕運官司查實給賞輕齎銀十兩官軍不分賊數多少俱照例發邊衛永遠充軍有司官吏從重問擬仍行原衛所將失事之人家產變賣抵償不許輕扣別軍月糧以長姦惡前後幫船知而不舉一體連坐仍于正犯所欠錢糧內責令幫賠十分之三又議准漂流糧米三千石以上提問把總官不及數者止提問本管官旗 又議准漕運把總指揮千百戶等

官如有漂流數多把總三千石指揮及千戶等官全幫領運者一千石千戶五百石百戶鎮撫二百五十石俱問罪於見在職級上降一級有能自備銀兩不費別軍羨餘當年處補完足者免其問降若願隨下年糧運補完亦准復職止完一半准復一級三年內儘數補完亦准復原職

凡掛欠萬曆二年題准掛欠官員果故絕無人承襲將原欠糧銀除豁免追以後把總官任內如分毫顆粒掛欠縱陞遷不許離任敢有朦朧赴任者恭提革任問罪監追 十二年議准運糧官旗掛欠數多把總名下三千石或銀一千五百兩以上指揮名下及千戶等官全

幫領運者一千石銀五百兩以上千戶五百石銀二百五十兩以上百戶鎮撫等官二百五十石銀一百二十兩以上各遞降一級每一倍加一等有能當年補完者通免降級如下年補完及三年內全完者准奏復原職其一應提問官旗各省及直隸江南衛分行各該巡按御史南京并江北衛分行漕運衙門各就近提問以便完結

漕禁新例

今上萬曆九年題准備行各監兌官及兼理漕運御史將該兌糧米眼同州縣官并運官看驗明白交兌取具有司結狀運官領狀備將緊要數目字樣用印鈐蓋各一

樣四本一存監兌委官一送漕運衙門一送戶部一送
總督衙門案候收糧如米色與結狀不同卽係官旗插
和若有司縱容糧長將爛米搪塞不肯從實結報各從
重叅究 十二年議准軍旗有欲呈告運官不法事情
者許候糧運過淮并完糧回南之日赴漕司告理如赴
別衙門挾告詐財者聽把總官就拿送問該徒罪以上
調發邊衛充軍另拘戶丁補伍 又議准漕運官軍敢
有水次折乾及中途糶賣以致抵壩起欠及臨倉掛欠
者卽係侵欺除正犯查照律例問擬外其餘官旗仍各
總計名下欠數總小旗欠一百石問發哨瞭百戶鎮撫
欠二百五十石千戶欠五百石指揮及千戶等官全幫

領還者欠一千石把總官欠三千石俱問罪降一級發
原衛所帶俸差操有能臨時設法買補完足止作折賣
正犯各官旗免罪其雖不係侵盜但有虧折俱照前例
擬斷若總欠數多及粗惡不堪至三萬石以上總督總
兵等官另行奏請定奪 又議准漕運把總指揮千百
戶等官索要運軍常例及指以供辦等費爲由科索并
扣除行月糧與船料等項值銀三十兩以上者問罪立
功五年滿日降一級帶俸差操如未及三十兩者止照
常科斷其跟官書寫人等指稱使用科索軍人財物入
已者計贓論罪如至二十兩以上發邊衛充軍 又議
准衛所官完糧後備造支銷數目呈報稽考若有造報

不明及侵欺靠損情弊許運軍指實首告各查照律例
從重問擬把總官失于覺察叅問治罪 又題准凡漕
運錢糧有侵盜銀三百兩糧六百石以上俱照侵盜本
律仍作真犯死罪係監守盜者斬係常人盜者絞

民運

今上萬曆九年議准行漕司及各巡撫將江南五府應運
白糧令各糧長仍顧五百料中船勿令夾帶私貨應得
水脚當官議定先給一半其餘印封船過徐州總部官
驗給 又題准每歲解京白糧務點殷實糧戶正身解
納不許棍徒包攬應運米數先儘本名如有官戶銀米
責令運送倉庫轉給領解以杜短少賠累船隻許令糧

長自顧五百料中船每百石定給銀三十三兩埠頭等役悉行查革經過鈔關如果止于土宜四十石免其納稅糧至丁字沽以北河西務正事卽照軍糧所定腳價撥船起剥經紀搬抗過壩不許仍前寄囤如有積棍攬解歇家科擾等弊聽巡視科道叅究糧完之日解戶批單給發部運官領回類繳各有司不必監比家屬仍刊稽獎文票聽巡倉御史查給稽繳

空運

今上萬曆九年題准奠靖倉原撥漕糧十五萬石內將二萬石自沙子營陸運改撥居庸倉收貯轉放居庸黃花橫嶺三路官軍月糧以免召商勞費其搬運腳價奠靖

倉每石銀四分今每石加一分共加銀二百兩責令殷
實商役領運 十一年議准營州左屯衛官軍月糧遠
赴通倉不便自萬曆十二年爲始每年漕糧到日通州
管糧郎中撥發二千五百石就令昌鎮運糧經紀自通
州水運至順義縣小東莊每石給腳價銀三分七厘五
毫自小東莊陸運至城每石給銀五厘俱在隨糧輕齊
銀內動支該衛官軍逐月關領

漕運職官

總督 都御史一員 總兵官一員

把總 南京二員 中都留守司一員 浙江二員

江西二員 湖廣一員 山東一員

江北直隸二員 江南直隸二員

監兌 戶部主事五員

每歲于漕運議事畢選差請勅分往山東河南直隸浙江江西湖廣督軍民有司依期交兌催兌起程南運督至議真與僱運官交接明白即將各兌完起程并文接日期報部查考同日仍將兌完日期具奏

僱運 御史一員 舊用戶部郎中三月奏差今改御史

押運 叅政一員 舊有協同漕運叅將二員今革

理刑 刑部主事一員 三年代萬曆二年革十一年復差

景皇帝景泰二年始置 欽差總督漕運都御史一員駐

淮安府

英宗天順二年始設理刑刑部主事二員亦駐淮安管廠

工部主事二員駐清江浦監倉戶部主事四員一駐淮安一駐臨清一駐徐州一駐德州管河工部郎中二員一駐安平鎮分理濟寧以北閘一駐高郵州分理濟寧以南閘管洪工部主事二員一駐徐州洪一駐呂梁洪
憲宗成化二十年始設管閘主事二員一駐沛縣沽頭閘一駐濟寧又管泉工部主事一員駐寧陽卽南旺閘清江提舉一員在清江浦衛河提舉一員在臨清 欽差僸運糧儲兼鎮守地方總兵官一員協同漕運叅將一員俱駐淮安 二十一年令戶部差官一員於山東河南南京差官四員於浙江江西湖廣南直隸各領 勅督同該管糧官依期徵完

武宗正德六年題准照例于左右侍郎內差一員 七年
題准改委戶部官四員分往南直隸浙江江西湖廣地
方監兌 十一年題准監兌官兌完起程交接明白仍
回原兌水次整理下年糧運候交代回京 十五年罷
差南京官仍差戶部五員會同巡按御史監兌又差郎
中一員於沿河一帶自通州直抵儀真等處嚴督軍有
司催餉供用白糧并漕運京儲等項 又題准天津兵
備副使帶管白河漕運

世宗嘉靖四十四年題准南直隸浙江江西湖廣等處監
兌官各給關防一顆

穆宗隆慶元年正月給事中何起鳴言南直隸浙江杭嘉

湖添差御史一員給之 制書令其專理漕運其濟寧

以南河道舊屬兩淮巡鹽御史帶管者并以委之監兌

時則巡歷淮安以南水盛時則巡歷徐州以北河道漕

運可兼攝而並舉從之 三年題准兩浙巡鹽御史兼

督浙江杭嘉湖三府直隸蘇松常鎮四府漕務革監兌

官 四年題准漕船起行都御史坐鎮淮安叅將移駐

瓜儀總兵住徐州各分經理催督船糧 又題准給僨

運把總關防 又議准南京巡屯御史兼督應天太平

寧國安慶池州五府及廣德州糧務 五年題准差御

史僨運 又題准裁革叅將設叅政一員每年正月移

駐瓜儀經理糧船過閘過壩管押到京 又令兩淮巡

鹽御史兼督廬鳳淮揚四府及滁徐和三州糧務 六年議准徵寧池太兵備兼管糧務 題准給僨運郎中關防

今上萬曆五年題准仍差主事一員往蘇松常鎮監兌 六年停差僨運郎中 又令南京二總各衛運官俱與軍政僉書更番領運責成掌印官先期料理仍差南京兵部主事一員專管選補軍旗事務 九年復差主事一員往浙江監兌 十二年令兩浙巡鹽御史仍帶管漕糧止行文督催免其押送鎮江